



ASANGALEJE MPAKA KALAKALA

KABUKU KAKUTANDILA
KULIJIGANYA BAIBULO

A̱wende mundu kuti wakamuchisyeje: Am̱wende ju̱wapele kabukuka kuti w̱ajiganyeye Baibulo, kapena a̱wende liijiganyo lya Baibulo kupitila pa webusayiti jetu ja, **jw.org**.

[illegible]

Awalanje ndime jilijose yimpepe ni yiwusyo yayilembile ni yilembo yepiliwu mnope **(A)** soni ni malemba gakwe. **(B)** Malembaga gakugombelechessa mfundo syekulungwakulungwa. Amanyilile kuti malemba gane agalembile kuti “awalanje.” Akusosekwa kuwalanga malembaga valumo ni iwakwaiqanya.

Malowe gandanda pa mbali **(C)** jakuti *Kulijiganya Yejini* gakulondesa yachalijiganye. Tumitwe **(D)** tukulosya mfundo jekulungwa jakambilana. Awananje malemba, ajanje yiwusyo soni alolele mafidiyo **(E)**. Alolesoni yipikichala soni malowe gakulondesa yipikichalayo **(F)**, soni aganichisye yampaka ajanje pa mbali jakuti *Yakusawecheta Wandu Wane* **(G)**.

Lijiganyo lililyose likumala ni mbali jakuti *Yalijiganyisye soni Yiwusyo Yakuwili-sya (H)*. Alembe lisiku lya-malisisye kulijiganya lijiga-nyoli. Mbali jakuti *Akole Chakulinga Achi (I)*, jikusala yakusosekwa kutenda kuti akamulichisye masengo yaliji-ganyisye. Mbali jakuti *Ya-kulinga Yinesoni (J)* jana ngani syampaka asagule kuti agambe kusiwalanga kapena kulolela.

Malemba agalembile mwakuya **buku ja Baibulo (A)**, chaputala **(B)**,
kaneko **fesi kapena mafesi (C)**. Mwachisyasyo, **Yohane 17:3**
yikugopolela kuti buku ja Yohane, chaputala 17, fesi 3.

Ana Baibulo Mpaka Jakamuchisye Chamtuli?

Wandu wajinji akusasaka ali amanyilile yakwamba umi, kulaga, chiwa soni sogolo jawo. Nambo soni tukusalaga nganiso ni yampaka tutende kuti tupate yakusosechela ya paumi soni kola liwasa lyakusangalala. Wandu wajinji amanyilile kuti Baibulo jangagamba kwanga yiwusyo yakusosekwa mnope yakwamba umi, nambo jikusakamuchisyonsoni kukola umi wambone. Ana akuganisa kuti Baibulo mpaka jikamakuchisye mundu jwalijose pajika?

1. Ana Baibulo jikusajanga yiwusyo yapi?

Baibulo jikusajanga yiwusyo yakusosekwa mnope ayi: Ana umi watandite chamtuli? Ana chakulinga cha umi chili chichi? Ligongo chichi wandu akusimana ni yakusawusya? Ana ni chichi chachikusatendekwa mundu pawile? Naga jwalijose akusasaka mtendele, ligongo chichi ngondo sikusatendekwa? Ana chilambochi chichimala? Baibulo jikusatulimbikasya kupata kwanga kwa yiwusyoyi soni wandu wajinji apatile kwanga kwakwe.

2. Ana Baibulo mpaka jitukamuchisye chamtuli kuwa wakusangalala?

Baibulo mpaka jitulongolele chenene paumi. Mwachisyasyo, jikusakamuchisya walombane kuti asangalaleje yisyeyene. Jikusatusalila yampaka tutende kuti tumalane ni kulagasika nganiso soni yampaka tutende kuti tusangalaleje ni masengo getu. Patukupitilisya kulijiganya bukuji, chamanyilile kuti **“Malemba gosope [malowe galigose gagali m’Baibulo] . . . gakusakamuchisya.”**—2 Timoteo 3:16.

Kabukuka ngakakwinjila m’malo mwa Baibulo. M’malo mwakwe kakwalimbikasya wawojo kuti alijiganyeye Baibulo pajika. Myoyo tukwalimbikasya kuti awananje malemba ga mu lijiganyo lililyose soni aloleje kamulana kwakwe ni yakulijiganya.

KULIJIGANYA YEJINJI



Chitulole yajitite Baibulo pakwakamuchisya wāndu, yampaka tutende kuti tusangalaleje patukujiwālanga soni ligongo lyakwe tukusosekwa kwawenda wane kuti atukamuchisyeje kujipikanichisya.

3. Baibulo mpaka jitukamuchisye

Baibulo jili mpela kuwala kwa machili mnope. Mpaka jitukamuchisye kusagula chenene yindu soni kumanyilila yayichitendekwa msogolo.

Awālanje Salimo 119:105, kaneko akambilane yiwusyo ayi:

- Ana juwalembile Salimoji wajiwonaga wuli Baibulo?
- Ana wawojo akusajiwona wuli Baibulo?



FIDIYO: *Akajasa Cembeceyo!*
(1:48)


4. Ana Baibulo mpaka jijanje yiwusyo yetu?

Baibulo jamkamuchisye jwamkongwe jwine kupata kwanga kwa yiwusyo yawakwete. **Alolele FIDIYO**, kaneko akambilane yiwusyo ayi.

- Mwakamulana ni fidiyoji, ana jwamkongweju jwakwete yiwusyo yapi?
- Ana kulijiganya Baibulo kwamkamuchisye wuli?

Baibulo jikusatulimbikasya kuti tuwusyeje yiwusyo. **Awālanje Mateyu 7:7**, kaneko akambilane chiwusyo achi:

- Ana akwete yiwusyo yapi yakusasaka kuti Baibulo jajanje?



FIDIYO: Kuŵalanga Baibulo
(2:05)

5. Yampaka atende kuti kuŵalanga Baibulo kuŵeje kwakusangalasya

Kuŵalanga Baibulo kukusikwasangalasya ŵandu ŵajinji soni kukwakamuchisya. **Alolele FIDIYO**, kaneko akambilane yiwusyo ayi.

- Mwakamulana ni fidiyoji, ana ŵachinyamata akusakuwona uli kuŵalanga?
- Atamose kuti ŵachinyamataŵa ŵanganonyela yakuŵalanga, ligongo chichi akusaŵalangaga Baibulo?

Yajikusasala Baibulo mpaka yitulimbikasye soni kutupa chembeche-
yo. **Aŵalanje Aloma 15:4**, kaneko akambilane chiwusyo achi:

- Ana akusangalala ni yatuŵalasile palilembali pakwamba yatukwembecheya msogolo?



6. Ŵane mpaka atukamuchisye kujipikanichisya Baibulo

Kupwatika pakulijiganya pajika, ŵandu ŵajinji ayiweni kuti yili yakamuchisya kulijiganya Baibulo ni ŵane. **Aŵalanje Masengo 8:26-31**, kaneko akambilane chiwusyo achi:

- Ana Baibulo mpaka tujipikanichisye chamtuli?
—Alole vesi 30 ni 31.

Jwamlume jwa ku Itiyopiya jwasosekwaga chikamuchisyo kuti agapikanichisye Malemba. Ŵandu ŵajinji akuweni kusosekwa kwakulijiganya Baibulo ni ŵane

YAKUSAŴECHETA ŴANDU ŴANE: “Kulijiganya Baibulo kuli kwasa ndaŵi.”

- Nambi wawojo akuganisya uli? Ligongo chichi akwanga myoyo?

YALIJIGANYISYE

Baibulo jili jakamuchisya, jikusajanga yiwusyo yakusosekwa mnope, jikusi-jalimbikasya wandu soni kwakamuchisya kola sogolo jambone.

Yiwusyo Yakuwilisya

- Ana m'Baibulo mpaka tupate malangiso gamtuli?
- Ana Baibulo jikusajanga yiwusyo yine yapi?
- Ana akusaka kulijiganya yindu yapi m'Baibulo?

Tumalisisye kulijiganya pa

Akole Chakulinga Achi

- Aŵalanje mbali jandanda ja lijiganyo 2.
- Yakulinga yine:



Kuti apate mafidiyo soni yakuŵalanga yosope ya mu LIJIGANYO 01, ajambule kachidindo aka kapena alole buku jakuti *Asangalaleje Mpaka Kalakala* pa jw.org

YAKULINGA YINESONI



Alole yajikuti kwakamuchisya wandu Baibulo.

“Baibulo Jikusajiganya Yakamucisya Ndaŵi Syosope”
(*Sanja ja Mlonda* Na. 1 2018)



▶ 2:53


Alole yajatite Baibulo pakumka-muchisya jwamlume juŵalagasi-kaga nganisyo.

Akajasa Cembeceyo!



Awungunye yajikusasala Baibulo yampaka yikamuchisye maŵasa.

“Yindu 12 Yakamucisya Maŵasa Kuŵa Gakusangalala”
(*Ajimuche!* Na. 2 2018)



▶ 3:14

Alijiganye yajikusasala Baibulo pakwamba jwakulamulila chilambochi.

Ligongo Cici Tukusosekwa Kulijiganya Baibulo?—Fidiyo Josope

Baibulo Jikusatukamuchisya Kukola Sogolo Jambone

Wandu pachilambopa akusimana ni yakusawusya yayikwatendekasya kuti akaŵaga ŵakusangalala, alajeje nganisyo soni kupikana kupweteka. Ana wawojo pakwete payatendechele yeleyi? Komboleka kuti akulaga ni ulwele kapena kuti mundu juŵamnonyelaga awile. Mwine mpaka aliwusyeje kuti, ‘Ana yili yakomboleka kola umi wakusangalala?’ Baibulo jikusajanga chiwusyo chelechi.

1. Ana Baibulo jikusasala yamtuli pakwamba yamsogolo?

Baibulo jangagamba kusala ligongo lyakwe chilambo chigumbele ni yakusawusya, nambo jikusalasoni kuti yakusawusyayi yichimala. Yajikusasala Baibulo yikusatupa **“chembecheyo.”** (Aŵalanje Yelemiya 29:11, 12.) Chembecheyochi chikusatukamuchisya kupilila yakusawusya yetu soni kuŵa ŵakusangalala. Chikusatusimichisya-soni kuti tuchiŵa ŵakusangalala mpaka kalakala.

2. Ana Baibulo jikusasala kuti umi uchiŵa uli kusogoloku?

Baibulo jikusaŵecheta kuti jichiyika ndaŵi jele ngasipapagwa **“chiwa, chanasa, kulila, kapena kupikana yipwetesi.”** (Aŵalanje Chiwunukuko 21:4.) Yakusawusya mpela kulaga, ungali chi-

lungamo, yilwele soni chiwa ngasiyipagwasoni. Baibulo jikusaŵecheta kuti wandu tachisangalala ni umi mpaka kalakala m’paladaiso pachilambopa.

3. Ana mpaka atende yamtuli kuti akulupilileje yajikusasala Baibulo?

Wandu ŵajinji akusakola chembecheyo, nambo akusakayichila yakwambecheyayo kuti yichitendekwa. Nambope yajikusasala Baibulo yichitendekwa. Mpaka aŵe ŵakusimichisya kuti yeleyi yichitendekwa naga **‘akupikanichisya Maloŵe ga Mlungu mwalung’wanu.’** (Masengo 17:11) Pakulijiganya Baibulo mpaka asagule kuyikukupilila yajikusajiganya Baibulo yakwamba yindu yayichitendekwa msogolo.

KULIJIGANYA YEJINJI

Chitulole yajikusasala Baibulo yayichitendekwa msogolo. Soni kuti chembecheyo chachikusimanikwa m’Baibulo chikwakamuchisya wāndu wājinji.



4. Baibulo jikusatusalila kuti tuchikola umi wangamala soni wamlama

Kwende tulole yajikusasala Baibulo yayichitendekwa msogolo. Ana ni yindu yapi yakusayijembecheya mwachidwi, soni ligongo chichi?

Awalanje malemba gagali pasipa gagakusala yayichitendekwa msogolo kaneko aganichisye yiwusyo ayi:

- Ana akuganisa kuti malembaga gali gakamuchisya kwa wawojo? Ana malembaga mpaka gape chembecheyo wamwiwasa mwawo kapena achimjawo?


Aganichisye ali mkutama m’chilambo mwele:

MWANGALI . . .

- kupikana kupweteka, kalambala kapena chiwa.—Yesaya 25:8.
- kulwala kapena kulemala.—Yesaya 33:24; 35:5, 6.
- yindu yangali chilungamo.—Yesaya 32:16, 17.
- kulaga ligongo lya ngondo.—Salimo 46:9.
- kulagasika nganiso.—Yesaya 65:17.

JWALIJOSE . . .

- chachawona achimjawo wele wawawile ali mkwimuka.—Yohane 5:28, 29.
- chachisangalala ni chilu chambone soni chachikola machili mpela anyamata.—Yobu 33:25.
- chachikola yakulya yejinji, majumba gambone soni chachisangalala ni masengo gawo.—Salimo 72:16; Yesaya 65:21, 22.
- chachiwa pamtendele usyesyene.—Salimo 37:11.
- chachitama ni umi mpaka kalakala.—Salimo 37:29.



5. Yajikusasala Baibulo mpaka yitukamuchisye atamose apano



FIDIYO: Nasakaga Kumalana ni Yindu Yangali Chilungamo (4:07)



Wandu wajinji akusajasa mtima soni kutumbila ligongo lya yakusawusya yakusasimana nayo. Wandu wane akusalilingalinga kuti achenje yindu. Alole yayitite pakwakamuchisya wane yakulochesya ya m'Baibulo. **Alolele FIDIYO**, kaneko akambilane yiwusyo ayi.

- Mwakamulana ni fidiyoji, ana Rafika jwalagaga ni yindu yangali chilungamo yapi?
- Atamose kuti yindu yangali chilungamoyo nganiyimala, ana Baibulo jamkamuchisye chamtuli?

Yajikusasala Baibulo pakwamba ya msogolo mpaka yitukamuchisye kumalana ni kulagasika nganiso patusimene ni yakusawusya. **Awanje Misyungu 17:22** ni **Aloma 12:12** kaneko akambilane yiwusyo ayi:

- Ana yajikusasala Baibulo mpaka yakamuchisye kola umi wambone? Ligongo chichi akwanga myoyo?

YAKUSAWECHETA WANDU WANE: “Yajikusaŵecheta Baibulo yili yakayikasya.”

- Ligongo chichi akusosekwa kupata maumboni gakatendekasya kulupilila yajikusasala Baibulo?

YALIJIGANYISYE

Yajikusasala Baibulo pakwamba ya-msogolo yikusatupa chembecheyo soni kutukamuchisya pa yakusawusya yetu.

Yiwusyo Yakuwilisya

- Ligongo chichi wandu akusosekwa kola chembecheyo?
- Ana Baibulo jikusasala yamtuli pakwamba ya msogolo?
- Ana yatukwembecheya msogolo, mpaka yitukamuchisye wuli?

Tumalisisye kulijiganya pa

Akole Chakulinga Achi

- Amanyilile yajasasile Baibulo pakwamba ya msogolo pakuwalanga malemba gagali mu lijiganyoli.
- Yakulinga yine:



Kuti apate mafidiyo soni yakuwalanga yosope ya mu LIJIGANYO 02, ajambule kachidindo aka kapena alole buku jakuti *Asangalaleje Mpaka Kalakala* pa jw.org

YAKULINGA YINESONI



Alijiganye mwampaka chembecheyo chakamuchisye pasime ne ni yakusawusya.

“Ana Chembecheyo Chisyesyene Mpaka Tuchipate Kwapi?” (*Ajimuche!* Epulo 22, 2004)



Ana chembecheyo chakwamba ya msogolo mpaka chakamuchisye uli wakulwala ulwele wekulungwa?

“Ana Baibulo Mpaka Jakamuchisye Naga Akulwala Ulwele Wekulungwa?” (Ngani ja pa intaneti)



▶ 3:37

Pakulolela fidiyo ja nyimboji, aliwanichisyeje wawojo ni liwasa lyawo ali mkusangalala m’Paladaiso.

Aliwanichisyeje Ali M’chilambo Chasambano



Awalanje jajwatite pakuchenga munda juwaputilaga ufulu wa wandu soni yinyama panyuma pakumanyilila yayichitendekwa msogolo.

“Apano Nganingolasoni Nganisyo Syakuchichenga Chilambo” (*Sanja ja Mlonda*, Julayi 1, 2013)

Ana Akusajikulupilila Baibulo?

Baibulo jikusasala yayichitendekwa msogolo soni mwana yindu yejinji yakutukamuchisya. Kombaoleka kuti akusasaka kumanyilila yajikusajiganya Baibulo. Nampo mwine akusajiwona kuti jili jakusawusya kujikulupilila. Ana akusosekwa kukulupilila yajikusasala Baibulo atamose kuti jili buku jakalakala? Ana yajikusasala Baibulo yili yakamuchisya masiku agano? Ana mpaka tukulupilile yajikusasala yakwamba msogolo? Wandu wajinji akusaganisya myoyo. Aole maumboni gampaka gatendekasye kuti ajikulupili-je.

1. Ana ngani syasikusasimanikwa m'Baibulo sili sisyesyene?

M'Baibulo mwana “**maloŵe gakuwona.**” (Jwakulalichila 12:10) Jikusasala ngani sisyesyene sya wandu. (Aŵalanje Luka 1:3; 3:1, 2.) Wākulemba mbili soni wakuwukula ya m'masame asimichisye kuti yajikusasala Baibulo pakwamba ya ndaŵi, wandu, malo soni yakutendekwa, yili yisyesyene.

2. Ligongo chichi mpaka tujile kuti Baibulo jili jakamuchisya?

Baibulo jikusasala yindu yele nganiyimanyikaga chenene pandaŵi jijalembedwaga. Mwachisasyo, jikusasala ngani syakwamba ya sayansi.

Sine mwa nganisi syaliji syakusawusya kusikulupilila pandaŵi sisylembedwaga. Nampo, ŵasayansi ŵa masiku agano akwitichisya kuti yajikusasala Baibulo yili yisyene. Yeleyi yikulosya kuti Baibulo jili jakudalilichika kwa “**yaka yosope.**”—Salimo 111:7, 8.

3. Ligongo chichi tukusosekwa kukulupilila yajikusasala Baibulo yakwamba msogolo?

Baibulo jikusasala yakulochesya* yejinji ‘**yele yichitendekwa.**’ (Yesaya 46:10) Jasasilesoni mwayichitendechelaga yinduyo. Mulijiganyo ali, chitulole yindu yine yajasasile Baibulo kuti yichitendekwa.

* Yakulochesyayi yili utenga wa Mlungu wakusala yayichitendekwa msogolo.

KULIJIGANYA YEJINJI

Chitulole kukamulana kwakupali pa yapatile ŵasayansi ni yajikusasala Baibulo. Chitulolesoni yakulochesya yine ya m'Baibulo.

4. Sayansi jikusakamulana ni yajikusasala Baibulo

Kalakala, ŵandu ŵajinji ŵakulupililaga kuti chilambochi chitemi pamalo ganegakwe. **Alolele FIDIYO.**



FIDIYO: *Chilambo Nganichitama pa Chindu Chilichose (1:13)*


Kwende tulole yajasasile buku ja Yobu yaka 3,500 yipiteyo. **Aŵalanje Yobu 26:7**, kaneko akambilane chiwusyo achi:

- Ligongo chichi yalisasile lilembali yakuti 'wachiŵisile chilambo pamalo pipaliji pangali chilichose' yili yakutesya chidwi?

Lyuŵa palikuŵala mesi gakusajawula kwinani kutyochela m'nyasa. Kaneko ula pajigwile, mesi gakusawujilasoni kunyasa. Ŵandu nganamanyililaga kajende ka mesi keleka mpaka mu yaka 200 yipiteyo. Kwende tulole yajasasile Baibulo yaka 3,500 yipiteyo. **Aŵalanje Yobu 36:27, 28**, kaneko akambilane yiwusyo ayi:

- Ligongo chichi yalisasile lilembali yili yakusangalasya?
- Ana lilembali lyalimbikasisye chamtuli kujikulupilila Baibulo?

Baibulo jikusasala mwagakusajendela mesi



FIDIYO: *Baibulo Jasasile Kala ya Konasika Kwa Babiloni (0:58)*

5. Baibulo jasasile kala yakutendekwa yakusosekwa mnope

Aŵalanje Yesaya 44:27–45:2, kaneko akambilane chiwusyo achi:

- Ana Baibulo jasasile yamtuli yili yisigele yaka 200 kuti msinda wa Babiloni ujonanjidwe?

Alolele FIDIYO.

Mbili jakala jikusatusimichisya kuti Mwenye Sailasi, jwa Pelesiya, pampepe ni asilikali wākwē wawugomeche msinda wa Babiloni mu 539 B.C.E.* Jemanjaji wasepwisye mesi ga mlusulo lwalwache-njelaga msindawo. Wajinjile mumsindawo kupitila pa mlango wawaliji wangawugala ni kuwusumula mwangalajila kuputa ngondo. Sambano papitile yaka 2,500 msinda wa Babiloni wuli masame. Kwende tulole yajasasile Baibulo.

Aŵalanje Yesaya 13:19, 20, kaneko akambilane chiwusyo achi:

- Ana yajasasile Baibulo ya konasika kwa Babiloni yakwanilichikwe chamtuli?

* B.C.E. jikugopoleta “Yesu mkanayiche,” soni C.E. jikugopoleta “Yesu ali ayiche.”



Msinda wa Babiloni uli masame ku Iraq

6. Baibulo jasasile kala yayikutendekwa masiku agano

Baibulo jikusasala kuti tukutama ‘m’masiku gambesi.’ (2 Timoteo 3:1) Kwende tulole yajasasile yakwamba ndaŵi jambesi:

Aŵalanje Mateyu 24:6, 7, kaneko akambilane chiwusyo achi:

- Ana Baibulo jasasile kuti yindu yichiŵa uli m’masiku gambesi?

Aŵalanje 2 Timoteo 3:1-5, kaneko akambilane yiwusyo ayi:

- Ana Baibulo jasasile kuti wāndu chachiŵa wamtuli m’masiku gambesi?
- Ana wawojo asiweni ndamo syapi sili mkutendekwa?



YAKUSAŴECHETA WĀNDU WĀNE: “Baibulo jili buku ja adisi.”

- Ana ni chichi chachikwatendekasya kulupilila kuti Baibulo jili jakudalilichika?

YALIJIGANYISYE

Yajikusasala Baibulo pakwamba ya mbili jakala, yasayansi soni yakulochesya, yikusalosya kuti mpaka tujikulupilile Baibulo.

Yiwusyo Yakuwilisya

- Ana ngani syasili m'Baibulo sili sisyesyene?
- Ana ni ngani syapi sya Sayansi syasikusakumulana ni yajikusasala Baibulo?
- Ana Baibulo mpaka jisale yayichitendekwa msogolo? Ligongo chichi akwanga myoyo?

Tumalisisye kulijiganya pa

Akole Chakulinga Achi

- Kuti ajikulupilileje Baibulo aŵalanje kapena alolele jimo mwa mafidiyo gagali pa yinesoni
- Yakulinga yine:



Kuti apate mafidiyo soni yakuŵalanga yosope ya mu LIJIGANYO 03, ajambule kachidindo aka kapena alole buku jakuti *Asangalaleje Mpaka Kalakala* pa jw.org

YAKULINGA YINESONI



Ana Baibulo jikusasala yaunami pangani ja sayansi?

“Ana Yajikusasala Baibulo Yikusakumulana ni Sayansi?”
(Ngani ja pa intaneti)



Ana ni yindu yapi yayikulosya kuti tuli 'm'masiku gambesi?

“Yakulochesya 6 ya m'Baibulo Yatukuyiwona Yili Mkukwanilichikwa” (*Sanja ja Mlonda*, Meyi 1, 2011)



Alole kukwanilichikwa kwa yakulochesya ya m'Baibulo ya Ulamusi Wekulungwa wa Gilisi.

Kulimbikasadwa ni “Malowē ga Yakulocesya”



Aŵalanje yayamkamuchisye jwamlume jwine kuti ajiwoneje Baibulo mwakuŵajilwa.

“Nganingulupililaga Yakuti Mlungu Apali” (*Sanja ja Mlonda* Na. 5 2017)

Ana asangalele ni yalijiganyisye?

Ana mpaka asache kulijiganya yejinji kutyochela m'Baibulo?

Yalijiganyisyezi yigambile kuwa kambali ka yindu yampaka alijiganye m'buku jakuti

Asangalaleje Mpaka Kalakala
—Kulijiganya Baibulo Mwakambilana.

Kulijiganyaku soni bukuji yili yalulele. Tuchiwa wakusangalala kulijiganya yalumo ni wawojo pamalo soni pandawi jampaka asagule.

Yine mwa yindu yachalijiganye m'bukuji yili:

■ Chakulinga cha umi

■ Yampaka tutende kuti tuwe wakusangalala yisyesyene

■ Yampaka mawasa gatende kuti gawe gakuangalala?

■ Yajikusasala Baibulo pakwamba yakusogolo



Kuti apate bukuji soni kuti apitilise
kulijiganya bukuji, awonegane ni jwa
Mboni sya Yehofa, kapena aende
lijiganyo lya Baibulo kupitila pa **jw.org**

Photo Credit: Page 13, Babylon's ruins:
Image © Homo Cosmicos/Shutterstock

Kabukuka ngaŵa kakusumisiya. Gaŵila kwa kabukuka kuli mbali ja masengo gakwiganya Baibulo ga pachilambo chosope gagakusa-jenda chenene ligongo lya yakupeleka yakusaka kwa mundu. Kuti apeleche yakupeleka ajawule pa donate.jw.org.

Naga nganitulosa Baibulo jine, Malemba ga m'Baibulo m'kabukuka, gatyochele mu Baibulo ja Chiyawo jakuwandisidwa mpela Buku Jiswela. Copyright © 2014 by the Bible Society of Malawi. Atukundile kuti tujikamulichisye

masengo. Nambope m'Baibuloji, Chilembo cha 'C' tukonjechesyapo 'H'.

Mabuku gosope gatugakolasile m'kabukuka gali gakuwandisiya wa Mboni sya Yehofa.

Asangalaleje Mpaka Kalakala
—Kabuku Kakutandila Kulijiganya Baibulo

Enjoy Life Forever!
—Introductory Bible Lessons
Malichi 2021 Printing

Chiyao (*Iffi-YA*)

© 2021
WATCH TOWER BIBLE AND TRACT SOCIETY
OF PENNSYLVANIA

Wakuwandisiya

Printed by Watch Tower Bible and Tract Society of South Africa NPC
1 Robert Broom Drive East, Rangeview,
Krugersdorp, 1739, R.S.A.

Made in the Republic of South Africa
Wapanganyisye ku Republic of South Africa

Ana yili yakomboleka kuwaga wakusangalala mpaka kalakala?

Ana mpaka ajile kuti . . .

- elo?
- iyayi?
- mwine?

ANA BAIBULO JIKUSASALA YAMTULI?

“Wandu wambone tachipochela chilambo, ni tachitama mwelemo kwa yaka yosope.”

—SALIMO 37:29.

ANA YELEYI MPAKA YAKAMUCHISYE CHAMTULI?

Kusogoloku tuchikola umi wakusangalala soni tuchitamaga mwa mtendele ni wamwiwasa mwetu soni achimjetu.—YELEMIYA 29:11.

Mpaka asangalale ni umi, ngaŵaga kwakandaŵi kamnono, nambo mpaka kalakala.

—SALIMO 22:26.

NAMBO ANA MPAKA TUKULUPILILEJE YAJIKUSASALAGA BAIBULO?

Elo kwabasi. Kuti tumanyilile ligongo lyakwe, kwende tulole maumboni gagakusimanikwa mu majiganyo gatatu ga m’kabukuka. Majiganyoga gana mitwe aji:

Ana Baibulo Mpaka Jakamuchisye Chamtuli?

Baibulo Jikusatukamuchisya Kukola Sogolo Jambone

Ana Akusajikulupilila Baibulo?



Iffi-YA
210402